

國粹叢書第二集

張文烈公遺詩

國學保存會印行



上海图书馆藏书



A541 212 0007 1565B

張文烈公畫像



## 張文烈公畫像記

余自幼時客海上卽聞明末吾粵有三忠曰陳文忠公子壯陳忠愍公邦彥張文烈公家玉皆以起義師抗節不屈而死心竊慕之丙申南歸於邑城錦巖曾拜陳忠愍公之墓謁雪聲堂得瞻其遺像丙午黃君晦以聽飄樓石刻陳文忠公贊岳武穆手札語見遺而鄧君溥溥復贈以其鄉張文烈公遺像於是而三忠之遺墨畫像皆得瞻仰以遂其向往之心矣顧吾讀劫灰錄載張文烈公事有云公年少貌秀拔聲巨詞辯又云公幼好擊劍任俠多結山澤之豪又云公常乘一黃馬神駿趨捷每臨陣風沙慘淡作勢怒鳴又讀鄭海雪集載公結纓死軍中得其首者懸之都門七日顏色不變秀眉如畫怒髮欲指則公雖以儒生而具烈士之節概此其能犯大難不顧卒以死報國而無愧也此像爲其安居時所作外雖雍容而內具剛健沉壯之氣毅然不可動嗚呼粵中起義之師事雖不成然牽制北兵使不得西上而翠華萬乘得以安葺於桂林武岡之間豈非三公之功哉予記張文烈像台陳忠愍像與陳文忠墨蹟共裝一軸晨夕束帶莊容而仰止輒神爲之壯復蒐得三公遺集而彙刻之屬予友黃史氏并爲之合傳焉後學順德鄧 實記

傳畧 錄王夫之永歷實錄列傳

張家玉字子元廣東東莞人年甫十九中崇禎祭未進士改庶吉士卓犖不隨時俯仰北都陷家玉衣斬衰哭思宗皇帝于東華門扣額搶地血出被面宛轉號啼不能起賊守者義之縱之逸遂南奔歸里思文皇帝立于閩以薦召見上素重其節概奏對尤稱旨授翰林院編修兼吏戶兵三科給事中爲御營贊畫俄奉使至廣東未復命閩陷家居蘇觀生立唐王聿錡要家玉同事不聽上自肇慶以左中允召家玉乃拜命道阻未赴李成棟陷廣州家玉毀家招義兵據東莞與陳子壯相應口巡撫王芋當崇禎末歷官僉都御史與家玉舊相知聞至是遣書敦勸家玉鬚髮出降畧云楊子爲我拔一毛而利天下不爲軻也譏之先生何愛一毛而不以利宗族鄉黨耶家玉得書大罵曰老賊不死乃敢侮孟子因答書責之曰兩都繼陷三君蒙恤玉謂公爲國大臣必久已死而尙存乎公豈不聞哭先帝于賊廷者爲誰而今欲以淫

詞汚君子之耳哉芋大怒遣兵攻之家玉抱險拒戰相持數日芋益兵大至家玉騎馬督陣過水次馬驚墜水死義軍口潰芋進兵屠之餘衆走入海永歷二年廣東反正家玉弟以事聞詔贈家玉詹事府少詹事兵部侍郎諡文烈家玉詩材亢爽于軍中作悲憤詩百餘首其弟梓行之有云真同喪狗生無賴縱比流螢死有光其志操可睹矣

張文烈公遺詩

順德鄧 實校錄

園居

翛然小藟林獨枕江臬遠竹籬通復隔花徑窮又轉近植旒檀香遠峯青蓮  
展主人日多暇疎茅手日翦芝田放鶴耕蘿幌呼猿捲有時縱短筇獨自下  
蘭坂寒雲送疏鐘遙驚隔林犬歸來到蒲團坐看松雲爍

過江臬留題

幽棲異人境永日息衆紛池塘過涼雨窗戶猶蒸雲石奇屢延屐花落自成  
茵停策聽鶯啼隔水望鷗羣是時日在參嘉禾猶欣欣綠醕瀉碧筒香飯糲  
青芹彼美區中人逍遙自采眞地偏絕攀援心遠無垢氛伊予秉微尙願與  
木石隣相期拾瑤草永結握蘭芬徘徊長林下敬謝修竹君好爲開芳徑毋  
令隔青塵

錄別

鴛鴦戲清池兩兩常相倚羽翼臨當乖風波中道起相對尙難知何況萬餘里毛褐雖云賤不奪於紈綺來親去者疏母爲貴公子一心抱區區君諒執高誼

阻風江上

涼颼撼江樹驟雨鳴相應引領盼前峰重雲隱飛磴迴舟向淺渚遙赴煙林暝雖阻利涉心頗盡沿洞興蒹葭共託詠幽蘭相折贈不亂鷗鳥羣翻取風濤靜夷險皆有適行止原無定焚香理素琴坐看歸帆競

金陵別陳髯公

雙鴻泊故林弋者忽言慕驚飛來遠天棲遲漢陽樹繪繳稍疏脫飲啄方爲故擬此暫閒適悠悠狎烟渚薰風自南來又爾振其羽江烟半入吳水色猶連楚中道各言邁羽翼乖其處我破燕山雲子披錢塘霧燕雀戀低枝區區何足數振翮凌霄漢翱翔向雲路飛飛念舊羣九萬仍回顧落日動離愁含



情悵南浦

白門舟中

棲遲白門下行采青溪  
蕨隔水望三山迢迢不可越  
中路逢勝友相攜理蘭  
櫂霜葉兼帆度江花背棹發  
東迎晨曦出西送素輝  
沒彼美隔蒹葭一水如  
天末瓊枝未獲攀  
瑤草何由掇  
相期赴良晤  
母令蕙草歇

游海淀題石上

稜稜碧山骨奇與巧兼  
擅似經鬼斧斲誰遣神鞭轉  
主人國柱石搜羅置亭  
院巖壑相蔽虧峰巒互隱  
現雲生蓮勢動雨過苔文  
絢旣藏宛委篇亦豎韓  
陵片鏗鏗流賦響錚錚  
答歌串生成補天物五色  
不待鍊岫幌晝常開磴道  
時獨踐會當逐靈槎言歸  
天漢口歲旱望爲霖好作  
零陵燕

圯上懷留侯

楚楚韓公子意氣何慨慷  
破產結壯士憤此宗國亡  
往往感異人出身爲連

口惜哉博浪椎不獲摧嬴秦既謝滄海君還過圯橋旁仙人黃石公素書發  
秘藏遂揖隆準公長驅入咸陽秦摧項亦感託身亡何鄉良則能用漢非漢  
能用良至今欽英風激烈動肝腸

與瓊敷堂主人論詩

雅樂久不振舉世淫其聲繁絃與急響嘈雜難爲聽之子青蓮後山水寄幽  
情爲我鼓瑤琴指下清冷冷一曲猶未終風泉滿座生問君何能爾近得師  
連城吾聞聲音道可以通神明靡曼不足恥所貴在和平願君終秘惜勿爲  
俗耳更

題虎丘慧日上人雪艇

聞師禪坐處舟居卻非水一葉破渺茫高風繼船子大地琉璃寒消息梅花  
裏誰知火宅中清涼有如此

聞警

妖氛日以逼天下正宵衣我武豈不張荷戈常苦飢仰給在東南民力亦已疲四郊復多壘患不獨東郵寄言肉食者大厦誰當支

贈友人小史

玉作雙口貝編齒引睇一堂漾秋水筵前飛去復飛來花底秦宮那似此約畧新詩發萬聲綠楊枝上啼春鶯墨花繡研臨池罷坐令屏幃烟雲橫主人向我漫誇說每過喚膠共披豁醉向春風玉樹旁欲占氍毹半堂月

採蓮曲

芙蓉花發江風香鴛鴦雙飛入金塘綠楊堤畔誰家女並着蘭橈鬪豔妝玉溼烟殘初過雨越羅衣袂凌風舉採蓮一曲遏紅雲卻笑荷花不解語江頭扶荔光陸離千樹萬樹紅霞披烟銷初褪玉肌露雙手貽郎不自持越來東水還東注那見當年浣紗處人生行樂湏及時不用五絲延命縷

變江抱月

銀蟾浩波江骨冷散步高原踏槐影清輝盈手笑相貽大地玻璃望中靜自  
從鼓棹去京畿兩見關山圓又虧冰心萬里遙相映一任緇塵變素衣

揚州賞牡丹

暖風動地羣芳悅十里香畦怒苞決蒸雲炙日不勝春坐見檀心一夜發綠  
葉枝疏翠簿拳天香國色各爭研楊妃睡起嬌無力鸚鵡杯中紫氣度碧檻  
雕闌十二重牢鎖春風不遣去青蓮學士昔揮毫賦就清平調獨高姚黃魏  
紫黯無色妬殺花前官錦袍

廣陵行爲林伯隆贈太康校書

揚州春色誇前古百尺危樓瞰江渚翠輦曾聞此地過司花來夢吟歌舞夢  
殘花落掩春衫無復官河漾錦帆江上月來空自照臨風誰唱望江南瓊花  
幻作太康女霓裳一曲空中舉憐春惜玉有林君首掛玉釵心自許從君呼  
酒醉瓊瑤春風無力海棠嬌十二巫山雲雨度一千閩苑鶴笙調三千十二

誰不羨過眼韶光急於箭勸君對酒日盡歡勸君莫負如花面君不見隋堤  
日暮飛楊花堤前垂柳空啼鴉

北上詠雪

冰綃催就鮫人織珠帳逶迤施九絨渾河昨日綠千尋一點鴨頭留不得塞  
上平沙漾月華北風翦水作飛花閑憑古樹嘯雲際卻似乘來銀漢槎磧西  
日沒重城閉一帶女牆飛白雉玉人何處把瓊枝笑指諸峯挽銀髻山河大  
地碧琉璃壯士寒威生鐵衣胡兒紫貂遮不迭無復臨邊散馬蹄紅旗半掩  
殘霞片細柳營中夜張宴將軍揖客坐氍毹綉幙錦箏圍戰炭梅花空憶故  
園春水鬻重茵夢不成欲招橘叟手相語更向瀛洲賭玉塵

相逢行

瑤池仙女何人謫明玉雕成雲外質記得夜深燭滅時光豔猶堪照一室輕  
盈廣袖來翩翩疑在緱山鶴背懸芳蘭竟體直堪把玉樹臨風殊可憐花前

一見兩相許笑隔天桃私致語竹葉深杯常互持春葱纖手頻相挽酒闌背  
燭解羅衣爲枕頻催欲就遲梨花院宇沈沈夜正是傾情倒意每日光漸透  
紗窗紫猶倚繡闥嬌不起依依楊柳夢初回綠髮參差雲半委滇與呼茗滌  
餘薰迴眸引睇方殷勤三生寒口曾相締一死從今拚與君君情我意方縈  
繫長指清松對寒歲豈謂歡來不畢輪遂使愛深還割袂人前作別兩相看  
雖復強笑摧心肝誰云合易離還易自覺留難去更難輿人駕車疾如駛咫  
尺相看成萬里離愁飛過嶺頭雲別淚灑添江上水江雨瀟瀟江路漫歸舟  
永夜夢魂寒春明好赴西陵約莫遣東風花鳥闌

讀李煙客集有賦

茫茫義海無邊際萬里青天蒙氣閉但逢故紙作生涯誰識筆頭有三昧羨  
君藝苑獨超群含毫解作千秋計赫蹄片片生春雲墨池飛出羅浮翠

贈瓊敷堂主人

雙龍劍怒吼春雷五色筆落雲霞開共道青蓮李居士本爲金粟舊如來誰  
園深處垂蘿幌一室能該九州廣坐擁牙籤萬卷書不羨人間百域長有時  
醉臥絳紗帷落花繞夢風前飛大人先生自高寄鄉里小兒那得知與余相  
視而莫逆把臂入林共昕夕花下一杯常互持枕中鴻寶互相析羣雞迥然  
分鶴立丈夫豈合分風塵飛騰變化會有日願子爲龍我作雲

### 游南山

維舟潭水曲引睇南山麓芳草含朝烟萋萋千頃綠萋萋芳草連翠微山中  
人兮薜蘿衣芝田縱步黃鶴舞竹枝脫手黃龍飛芝田竹杖千峯裏回首塵  
寰成萬里夕陽一帶掛荒城但覺寒烟沒江水寒江一片去悠悠芙蓉花落  
西風秋何如半榻松風引仙夢高飛一舉凌滄洲

### 過子陵釣臺

嚴子灘頭釣魚處一簑白雲一竿雨當初羨爾高蹈時手捲絲綸入烟渚何

期文叔來南陽吐子陵姓字香只今漢室已如此奚嫌蚤出相爲理

小憇湘江

小憇依丹壑蕭騷別洞天楓林疏落雁羅徑亂呼蟬客路餘千里鄉心□半  
年前津望不極迢遞隔湘烟

過漳江

千里漳江道何年罷遠征已看三月暮况是客中情遠水烟迷樹孤峯雨帶  
城長歌憐短鋏愁逐野湖生

柬徐九夷

我本自懷抱知君更不猶沈深類有道淡薄若無求月醉梅花國歌清郢水  
秋偶因君下榻卻憶舊南州

過戴隱士山莊不遇

爲愛戴安道翛然到竹軒寒雲流古堞綠水漲名園一陣秋過雁三聲啼斷



猿主人何處去不敢漫題門

茆山別洞訪羽士作

百折蒼苔路松風爲掃除林餘搗藥鳥池有聽琴魚命酌傾雲液分題簡玉  
書遙知烟路近行矣駕風車

游南池用杜韻

地扼全齊要門通萬里船臨流蔭高柳隔水聽鳴蟬荇帶拖殘雨蓮衣落暮  
天何人繼芳躅開徑掃花毡

對雪寄故園諸同好二首

獵獵北風動天涯雪色新瑤階不受日瓊樹向先春遠水相思夜空山獨臥  
人一枝春寄否珍重慰情親

土塵飛不盡四野撲衣來仄想羅浮上梅花應盡開何人翻雪浪有客傍瑤  
臺爲問溪橋水騎驢日幾回

贈家將軍

百戰推猷壯千秋賈勇餘  
白猿新授劍黃石舊傳書  
旣有烏孫馬門多魯國  
裾只今烽火急肯使老穰苴

蒼梧逢葉二開差

落日山欲暮蒼烟宿未收  
故人勞夢到相憶命孤舟  
帆影問潭月江聲話海樓  
蒲船歌吹發相對白蘋洲

贈鄧于都

正爾好清話胡能無贈卿  
由來松柏下只是綺羅情  
誰識塵埃裏相逢俠氣生  
春風少拘束淡蕩來江城

山行尋寺

愛着登山屐尋幽續勝緣  
危橋依峭壁斜樹引疏烟  
溪靜鹿羣飲雲閒鶴自眠  
聞鐘知有寺吾意欲逃蟬

山澗初靜

細雨過山家晴天漾晚霞殘流咽幽澗新綠上青莎翠浴枝頭鳥紅飄葉底  
花樵歌洞口發歸騎夕陽斜

春望篇

花事蕭條風雨邊登臨長笑倚江天北庭又報軍書至南土殊非樂國年戎  
馬亂嘶芳草路成樓深鎖綠楊烟賦詩憶得前人句東望望春春可憐

題王季重讀書佳山水樓

書城何處擁芸扉江上青山獨振衣碧澗時浮墨花出白雲長繞翠毫飛問  
奇客至抽元草報午猿啼過翠微卻憶匡君兄弟好牽帷曾共采苓歸

答秀水李青來

嘯竹高蹤繼昔賢遇風行處亦冷然粉香猶着佳人賦俠客爭傳白馬篇萬  
卷足輕南面貴千金難易國門懸入林把臂仍嫌晚何待山陰雪夜船

金陵春日逢友

鍾陵過雨紫烟開  
南浦清江隱薄雷  
春水滿堤春草綠  
故園千里故人來  
鶯聲弱柳傳歌板  
燕蹴飛花落酒杯  
一醉萍踪任分散  
不勞風笛夜相催

南陽經武侯故宅二首

眼前非復舊青徐  
千載瑯琊有故居  
歌舞漫悲漳水鵠  
風雲猶憶漢江魚  
隆中未竟生前畧  
篋裏空藏去後書  
不盡英雄滿襟淚  
爲君憑弔重踟蹰  
衰柳殘堤鎖夕陽  
行人猶憶臥龍崗  
半犁烟雨長吟處  
萬古乾坤一草堂  
夜月有時歸鶴唳  
秋風無復蒞戎行  
可憐舊業荒蕪盡  
空賸成都幾樹桑

燕郊春暮

曉來清夢破梨雲  
帝苑餘芳尙帶芬  
雨雨風風空善妬  
鶯鶯燕燕自爲羣  
澧蘭沅芷同心見  
徑李蹊桃一笑分  
紫陌舊斜扶醉去  
春城無處不氤氛

燕市弔袁督師

黃沙白霧皂雕旗，獨賴孤臣兩臂揮。  
齧血作書招死士，裹瘡臨戰立重圍。  
遂令漢卒聞笳奮，共掃妖氛奏凱歸。  
勞苦功高誰得似，中山何事謗書飛。

相思江

津樓欲曙角聲催，舟子招招喚渡開。  
鄉樹萬重將目斷，湍流千尺共腸迴。  
風生水面江神過，雲暗灘頭瘴母來。  
銷盡孤魂君不見，相思江上獨徘徊。

烏蠻灘

烏蠻灘上逆春雷，不數瞿塘滯壑堆。  
水似瑤階千折上，舟如怒馬側盤來。  
歌翻白雪流笙管，風引飛濤入酒杯。  
笑向湘江相借問，年年東去幾時回。

誰園探梅

羅浮村徑一林霜，飛入君家白玉堂。  
向煖正逢長至日，窺簾猶報隔年芳。  
檐間鳥入瓊瑤動，席上風生笑語香。  
東閣詩成稱絕唱，風流端不讓何郎。

贈宮詹李二何夫子

白水真人來漢朝白衣山人冠唐僚文章兩度壓元白千羽七旬格有苗壩  
上勞軍如見郭關中轉餉不推蕭北人牧馬戎南下司馬鴻名已度遼

同容瞻公北上別後卻寄

郵亭風急雪紛紛目斷南天雁幾羣白眼同爲千里客青山何事獨留君江  
南昨夜孤舟雨淮北今朝日暮雲處處山城唯戰鼓不堪回首賦從軍

步楊台覺上座靜空題朱秀峯前韻

結宇長依朱秀峯霏珠翠滴玲瓏烟霞不捲新朝露歲月常懸舊日容封  
作狼山一塊石標成銅柱萬年功撐持半壁君同我肯逐恆河浪寄蹤

廣陵曲六章

迢迢邗江道烟花咫尺迷朱樓臨紫陌畫舫接金隄隱隱聞歌吹相傳是竹  
西

五方推利藪到處是羶場夜市千燈艷春醪十里香豪華感行路知道是鹽

行

新鶯初學囀乳燕正交飛芳草青絲髮垂楊金縷衣昔日迷樓下家家擁翠幃

瓊瑤天下種桃李路傍枝愁受司花女嬌憐來夢兒奔月何時下爲雲未可知

逶迤錦步障亂轉七香車塵暗九衢月光生滿路枝何因墮珠淚言過玉鈎斜

悄悄牽幃出盈盈卻扇行衣裳秋水染笑語香風生卻向瓊花觀低頭禮玉清

尋嘉祐寺

英英白雲嬾杳杳青谿暮山僧不出門殘鐘在深樹

泛月二首

沿月縱蘭橈江烟碧未消清波不相待轉盼失溪橋  
澄江淨於練歸人浩思發不信捲簾人相思有明月

豔曲二首

扶嬌下繡幃與郎玉相映欲窺燕尾粧鏡前重引鏡  
去年笑參商今年咏鴛鴦願郎結同心勿復生他腸

題眞州寄園四首

水榭茅堂分峙溪橋石磴相連記得春山深處丹崖碧洞依然  
莫怪愚公移山信有神人鞭石請看一片平蕪幻出數峯秋碧  
紅樹山亭自遠落花一卷無塵雞犬不知有漢魚鳥自來親人  
古道近通楊子名園直偶辟疆借問竹西歌吹何如花下壺觴

津亭

魚子津亭牽客衣爲言前路去船稀野雲渡水迷江樹飛鳥蕭條帶雨歸



秋江夜月二首

霜滿空林紅葉稀捲篷秋露欲沾衣水鳥夜寒棲不定雙雙掠客船飛  
前村烟暝幾人家歸客扁舟泊淺沙隔岸漁燈乍明滅滿船涼月濕蘆花

湧汀晚泊

孤掉乘流晚更過半溪烟暝起漁歌老翁不管關心事自在船頭織綠箋  
家少參署中早梅

春煖南枝早亞衙半枝疏影上窗紗故園今夜三更月香發羅浮幾樹花  
過永淳

聞笛

古渡荒城瞰碧天鳶蘿斜掛夕陽烟寒溪不斷流今古楓葉辭秋過客船  
玉笛飛聲滿客城東風吹送故園情梅花亂落何人處唯見關山碎月明

別李烟客

扁舟隨雁出楓林回首禪房積翠深自笑塵緣消未得贈君惟有白雲心

過曲江謁先文獻祠二首

曲江山翠鬱巒岷萬古千秋祖烈存金鑑至今稱國寶豈惟勳業擅開元  
明燭幾先有遠圖可憐風度只今無催花羯鼓聲方闌早向漁陽識叛胡

卜居五首

卜築蓬蒿一徑斜池塘新綠映窗紗蒲團坐到忘機處不覺春風度落花  
蕭蕭夜雨拂窗蓬弱草柔條怯晚風卻怪南園數竿竹亦隨風動委池中  
小園春煖日芳菲晝閣攤書懶下帷求友黃鸝滿深樹山童不用欸柴扉  
丹崖碧洞鎖柴扉中有真人學息機卻笑白雲行不得風來又過別山飛  
風搖萬綠晝陰陰雙屐穿花不染塵記得斷橋流水畔虬枝時伴一溪雲

懷內二首

閨中昨日起離愁楊柳青青送客舟今夕淒涼又何處半帆煙雨楚江秋

連江風雨雁爭飛  
目送南天淚滿衣  
少婦夜深休閉閣  
征人多向夢中歸  
讀史十首（以下軍中遺稿）

讀史高齊日正紅  
書生子奪笑談中  
帝秦不是奇男子  
也有強梁向海東  
漢使堂堂出朔邊  
微茫海北鎖寒煙  
青羝白雪如逢我  
耐得蘇卿十九年  
順水長驅事已非  
龍潛虎伏失干旂  
南陽果係真天子  
定有王豐勒馬歸  
宣陽門外漢重圍  
日落華林掩夕暉  
國破家亡今古事  
肯隨會稽著青衣  
晉室傾頹事莫當  
雞聲啼起鐵肝腸  
諸君莫灑新亭淚  
好向中原識范陽  
漁陽鼙鼓動燕京  
若個傳來罵賊聲  
記得當年顏太守  
洛陽橋畔舌縱橫  
摩詰才名諫一時  
孤忠憤薄又成詩  
可憐一片珠江水  
翻作當年凝碧池  
望斷匡門不忍聞  
今今昨昨總紛紛  
稠州縱有黃龍瑞  
丞相傳來不姓文  
憶昔懸帆出建陽  
橋頭卜肆尙傳芳  
而今不管天人數  
却笑勞勞謝侍郎  
絳闕天甍舞不休  
義旗昨日起濠州  
東官曾有誇封伯  
掃却羶毬拜冕旒

讀文文山先生集不覺飲泣集先生句成六絕

南望端門淚雨衣冠塗炭可勝羞遙憐海上今塵土無限斜陽故國愁  
風打船頭繫夕陽孤臣性命寄何鄉江山有恨消人骨南北今年幾戰場  
魯連大節豈容磨回首中天感慨多春事暗隨流水去江山如此故都何  
國亡家破見忠臣何事癡兒竟誤身借問一門朱與紫黃金橫帶爲何人  
庭諍堂堂負直聲江南匹士死猶榮幾多江左腰金客不值人間一睡輕  
俛俛乾坤靡所之飄零回首壯心悲素王不作春秋廢獨抱春秋莫我知

過荒村四絕

幾日經行白骨堆蕭條窮巷哭聲哀亂離我亦亡家子總爲君王冒死來  
縹渺前途路欲迷黑雲留雨四村低山靈似笑征人馬何事勞勞不住蹄  
野塚蓬垣指顧中青山斷送幾英雄臥龍躍馬今何在博得浮名總是空  
狐矢妖氛障太清幾回翹首隔西京朝昇幸有扶桑日依舊紅光滿大明

嘆變

亦知牢落苦奔波其奈冠裳掃地何一自首陽人去後更誰重唱採薇歌

傷族罹禍

誰計忠成九族殃行藏我亦似文方但能完得君臣節磨涅從他也不妨

途中入絕

瘦馬崎嶇不肯前天涯飄泊苦烽煙何時范蠡功成去泛泛滄江一小船  
凜烈寒威戰碧蒼蕭蕭原野盡荒涼穠桃嫩李紛零落獨有青松不避霜  
馬上看山疊疊青山無地不腥羶誰堪滿目蒼涼處俯仰興思一涕零  
燈下嬌姬月下絃風流曾泛太湖船如今回首神京處腸斷西風憶往年  
雲淨天空朔氣寒舉頭何處是長安那堪幾點孤臣淚灑向楓林帶血看  
縹渺疏林在隔山數聲雞犬白雲閒澗澗一帶寒溪淺疑是秦人避此間  
家藏三畧已煙消勳業誰當比漢朝遙憶仙人遺履處幾回翹首望杞橋

高風曾見幾人稱綱紀先朝久已傾獨有南還陳太史文章節義兩留名  
將發

東泊西飄寄一身頭顱空帶楚冠塵千秋獨有文夫子同笑迎降賣國人

述志

赤悃曾披白日前敢將然諾負初年臣心一塊孤忠鐵誓與新朝不共天

出師

獨整王師陌上游村莊兒女盡凝眸請看我亦何曾異畢竟人間不剃頭

偶聞僮僕夜語

不達時情數蠢奴猶思家業苦嗟吁此身已置存亡外寧計田蕪與地蕪

痛悼先塋被伐

廬屋空餘一炬灰祖骸仍暴委蒿萊可憐忠孝難兼盡血灑西風寄夜臺

早行河源

野外燐飛閃閃明奇鳥相叫互悲聲沙場滿眼英雄骨獨有流波咽不平  
自舉師不克與二三同志怏怏不平賦此

落落南冠且笑歌肯將壯志竟蹉跎丈夫不作尋常死縱死常山舌不磨  
漫興

擬卜幽居絕世塵桃源無路可逃秦朝來怕縱瀟瀟目愁見青山換主人  
追昔

內苑曾推蓋世豪花磚睡起日輪高如今轉憶宸游地羞見承恩舊漢袍  
聞雞

惱夢初驚月落時雞聲錯聽赴朝儀鷓鴣班散處彤墀晏記得承恩退食遲  
春閨寓興

關塞超迢萬里賒紅顏多少老風沙祇圖肘後黃金印誤擲人間幾歲華  
竹林啼鳥送春暉何事行人尙未歸惆悵夜來窗月白夢魂飛不到金微

春病春愁兩不寬，愁連烽火是長安。何時得起龍城將，早向陰山解戰鞍。

謁大司馬袁自如先生遺祠

司馬遺忠尚有祠，重來客淚灑荒碑。長城借得先生在，肯致中原苦亂離。

讀于忠愍楊椒山兩公行錄不覺拍案

前有于兮後有楊，鬚眉男子兩堂堂。全忠自古難全孝，何況家亡與國亡。

寓目愴懷

三十無成荏苒過，眼前羞見舊山河。人民城郭皆非昔，怪得文山感慨多。

馬上感嘆

戎馬奔忙日易斜，風塵荏苒一長嗟。荒村寥落炊煙絕，愁聽垂楊噪暮鴉。  
郊原繚繞暗戈兵，笳鼓聲悲慘客情。心折幾回翹首望，路迷何處是西京。

軍中夜感

慘淡天昏與地荒，西風殘月冷沙場。裹尸馬革英雄事，縱死終令汗竹香。



得蕭年兄西京大捷之札志喜

微臣忽報復西京舉手良深舞蹈情萬國戎師今四集九天威福正中興蔡  
城再見鵝鳴捷淝水重聞鶴唳驚蚤晚賢王應授首長驅還擬掃龍庭

夜雨

欹枕更殘夜正深淒風苦雨助哀吟蓼莪忍誦思親句犬馬難忘報主心望  
斷江關愁極目夢回京國涕沾襟離離禾黍添新恨何日西歸得好音

不寐

蓬窗獨坐氣颼颼擊楫誰鄰士雅憂撒手已無兒女戀回頭寧有室家謀須  
知白水仍興漢未信西戎可繼周惆悵胡塵思欲掃幾回中夜舞吳鉤

雨行馬上縱目山川愴然追念余祖九齡公至宋世傑公皆孤忠表表  
凜然萬古

處處洶洶苦戰征炎方烽火幾時平雨聲偏灑孤臣淚風景空憐異代情國

破匈奴千古恨心懸明主一身輕唐朝宋室家聲在肯使吾曹落後名

丁亥重陽悼陣亡將士

回首天涯憶故鄉忽聞節候又重陽斷腸何處猿啼月警夢當階鶴唳霜擊  
楫幾時口海浦枕戈猶未掃櫬槍可憐多少英雄骨空照黃花吐烈香

夜坐

月落孤齋夜色濃戍樓深處鼓鼙身如繞樹南飛鵲影似傷弓北地鴻往  
事肯隨春夢散斜陽猶憶日輪東英雄成敗非今日狐史千秋自有公

月中早行馬上有感

匹馬蕭蕭欲發遲天涯游子去何之行人弓箭戎裝早載道兵戈羽檄馳淚  
灑杜陵偏我屬身如玉粲好誰依那堪淡月疏星夜不似南宮待漏時

謁大司馬袁自如先生遺祠愴然有感

弔罷遺祠淚幾揮遼陽回首事成非空留冷廟滄江上不見犁庭鐵騎歸星

落尙疑陰雨暗風高猶憶陣雲飛只今羽檄紛馳急那得先生再解圍

舟中

西風瘦盡骨稜稜衽甲猶能日飲冰暗地殘氛終北掃經天朝旭正東升千秋笑我愚張浚萬古令人唾李陵偶讀程嬰忠鑒錄幾回孤憤淚沾膺

夜走博羅

舉目烽煙黯自傷胡笳吹處似邊方真同喪狗生無賴縱比流螢死有光力盡張良虛博浪時窮許遠失睢陽當存百煉堅金志捲土重來未可量匹馬孤軍共一行旌麾凌亂勢蒼黃雲崩日落豺狼嘯地黑天昏傀儡強報國誰同堅鐵石捐軀吾任笑愚狂春秋勿謂千年絕身有遺編尙未亡

過馬溪山

縱馬揚鞭趨去程馬溪山上馬蹄輕江聲似寫前朝恨山色空留故國情入望烽煙迷遠近窺人豺虎漫縱橫孝陵佳氣應長在會見中興一旅成

宿村莊

陰風漠漠冷孤村寥落天涯憶故園勁草也知難偃地芳蘭何意忌當門夢  
回旅帳神猶奮淚灑征衫血有痕愁絕雞聲催戍角不堪清夜舞劉琨

感遇

顛倒蒼蒼亦可憐江山何地是安然宵行秣馬傳餐食夜宿連營抱鼓眠雪  
骨寒梅真我瘦冰心皓月爲誰圓從今一斗孤忠血總化春山哭杜鵑  
奔走孤臣膽備嘗死生誰復問蒼蒼獸蹄鳥跡交中國霧慘煙荒滿戰場昔  
日人謀應有定如今天命不于常江山無限淒涼淚拭向西風灑夕陽

營中晚坐

轅門坐冷夜悠悠燐火低飛笑鬼幽萬里山河悲戰角百年身世負虛舟羶  
腥我抱淪胥痛冠履誰甘倒置羞欲借朱雲當日劍奮來高斬佞臣頭

軍中懷陳長園

回首羅浮片月娟伊人何處冷風煙離羣忍聽三秋雁避難曾同一葉船盃  
酒不堪論往事南溪猶憶夜流連幾回話到中興處未卽聞雞已慙然

憶京華

峇嶽天府兩金湯妖氣蒼茫白日荒玉減香消虛少嬾花殘歌散冷朝陽銅  
駝北望沉荆棘鐵騎南侵滿戰場回首可憐關塞月擣衣砧上爲誰忙

憶朝

憶昔京華玉署連五更清珮入朝天闐闐絲管華燈下集集夔龍綵仗前虎  
帳罷收官漏箭螭階初裊御爐煙只今□□縱橫處誰挽天河洗□□

感憤

積弊和戎久已知不圖大木竟難支崑崙漫憶三通鼓淝水難同一局棋今  
古無窮終是幻死生有盡亦何悲夷齊去後無知己欲上西山繼採薇

榕溪曉發

風送牙檣復溯流此身漂泊一虛舟雖無諸葛平蠻策且作宗生破浪游死  
去不妨蠅作客生還何必爵封侯年來怒髮衝如戟慣處猶堪□□頭

憶昔燕畿之變

首逆何人賣國先遂令滋禍竟綿延內廷已失金吾守外地寧誇鐵甕堅萬  
井桑麻鋪戰壘千家城郭靜炊煙誰憐去國孤臣遠禾黍興悲幾涕漣

宿田家早起

唧唧雞聲促曙光勞勞人起戒行裝亂離幾厭兵戎苦迢遞徒悲道路長半  
榻雲窩猶未煖一宵萍水又他鄉何時得似王摩詰睡聽鶯啼懶下牀

哭楊邦達

昨夜西風折義旗今朝邦達竟何之丰標無復張文遠酣戰誰方許虎痴忠  
魄想應隨烈帝英魂猶自繞王師睢陽誓志終爲厲願壯山河□□□

秋宵月夜

刁斗烽煙處處驚  
長途來往盡游兵  
那堪冷月寒砧夜  
又聽西風北雁鳴  
京國幾年金闕夢  
鄉關何處白雲情  
憤來按劍轅門坐  
愁對旄頭斗外橫

舟中月夜

渺渺長江水接天  
帝京西望轉淒然  
金戈鐵馬無寧土  
錦纜牙檣有戰船  
離亂烽煙叢此日  
風流簫鼓換當年  
誰堪舊日長安月  
多照平沙白骨連

自弔

命也何當百六秋  
塵途空戴楚冠遊  
神能奮處仍飛涕  
石有靈兮亦點頭  
報國誰堪追定遠  
傳家我已愧留侯  
姓名他日昭人目  
幸不遺汗史冊羞

傷我明所用不得人致有今日之禍

徵兵轉餉日何窮  
少府金錢盡屨供  
不見犁庭殲勁敵  
惟聞棄甲走元戎  
摧殘禁苑煤山火  
零落朝儀建業鐘  
遙憶鼎湖兼雪窖  
忠魂曾有幾從龍

北向天驕憤未平  
無衣痛哭不成聲  
攄忠若個眞披瀝  
報國何人死戰爭  
漢

室威儀他日望商郊禾黍此時情鑿兵幾厭民心苦猶見經天太白橫  
防邊歲歲事專征不見顛連九廟驚古堞有城荒白下斜陽無語老燕京單  
于夜嘯巡屯馬上將壇空宿衛兵惆悵行吟秋月白不知今夕爲何明

難中聞逆首買健兒刺余獻敵予付一笑

蒼狗浮雲祇浪猜山河風景已相乖澄清祖述懷空切恢復文山志不諧縱  
死但知全骸髒達觀原自外形骸殺身取義吾曹事志士何須問墓埋

行次白石堆投宿村莊見園花盛開感賦

銀屏金屋鎖寥寥人物傷心撫六朝芳草正添行客恨名花仍放舊時饒啼  
殘杜宇聲聲血零落東風處處飄誰念多情張子野傷春懶上洛陽橋

輓陳同盟

國破家亡事兩傷孤忠羨爾鐵肝腸盟心共信真豪傑戮力同驅假犬羊激  
烈剛風生凜凜從容正氣死堂堂獨憐奇計人空老誓報如今只子房終



乙巳春予與同志倡國學保存會于滬上東莞家漢光先生以張文烈公遺詩手鈔本見寄令刊之國粹叢書中余讀公家傳知公著有鐵園文稿芷園詩軍中稿等久欲求得公文集合刊遲之久未得今先刊此計一百六十三首蓋合芷園詩軍中稿合鈔者而軍中稿僅得八十二首證以王船山公傳所云百餘首者已不全吾粵三忠陳忠愍公有巖野集陳文忠公有練要秋痕惟公詩文多散帙今讀公遺詩慨慷悲憤其忠愛故國念念不忘而攘外之思時溢于言表嘗集文山詩曰素王不作春秋廢獨抱春秋莫我知公之意深矣公殉節後其弟家珍曾爲梓行其軍中稿今刊本亦不存家珍字璩子家居折節讀書好賓客所爲詩歌蘭竹皆恍爽有致未三十而卒云卷首公像爲家溥溥先生所贈并于記此

氏書  
姚國  
山贈  
金捐

丁未九月後學鄧 實謹識

刊  
行

上海圖書館

光緒丁未九月二十日初版

國粹叢書第二集  
張文烈公遺詩

定價洋壹角伍分

原著者 東莞張家玉

印行者 上海四馬路東惠福里口  
國學保存會

發行所 上海四馬路東惠福里  
國粹學報館

上海圖書館藏書



A541 212 0007 15658

